




Literatura den Bon Dia

Ernesto E. Rosenstand



TUR COS A KEDA ATRAS

- Con anto?
- Mi kier pa nos uni.
- Pa nos logra algo bunita.

Carmen tabata scuch'e den silencio. Y esei mes a haci cu Juan tabata papia mas sigur e tabata sintie sigur di su conkista. Esaki mes tabata entusiasma'e pa e sigui. E tabata usa tur su mañanan pa gana Carmen.

Ma e tabata tur kiboca. Carmen tabata pensa otro. Esaki tabata scucha, ma e tabata dispuesto pa no laga Juan gañ'e cu su palabranan dushi. Y p'esei el a contest'e:

- Bou ki condicion?

Pa un momento Juan a perde e ventaha cu e tabata hibando. E no a spera e pregunta aki. Pa un momento el a keda keto. Nunca el a pensa riba condicionnan. Busca manera pa coordina su pensamentonan.

Su experiencia den asuntonan amoroso no a lague na caya. El a contest'e cu otro pregunta:

- Ki bo kier men?
- Loke mi a caba di bisa bo. Mi ta kere cu mi tabata tur cla posibel. Of no?

Carmen a contest'e sin sikiera mir'e. Atrobe esaki a sorprende Juan Poco poco el a cuminsa ripara cu Carmen tabata otro. Completamente otro.

- Caramba, e ta otro di loke mi a kere. Juan a bisa den su mes.
- Mi a kere cu lo mi por a conkist'e facil, ma ainda e ta poco shimaron. Mi mester ta mas cuatelo, mas diplomatico.

Y e ora el a mir'a den su cara y a bis'e:

- No haci co'i mucha chikito.

E obserbacion aki a haci Carmen rabia mas.

- No tuma mi pa mucha chikito!
- Ma bo ta actuando asina si
- Bo ta haya?
- Sigur cu si!
- Splica bo miho.
- Mira cu ami ta stima bo y abo ki bo ta contesta mi. Na ki manera bo ta reacciona?
- Bo ta haya?
- Claro cu si!
- Di con asina?
- Cu contestanan di un mucha mohe no normal bo ta busca manera di scapa curpa.
- Scapa curpa no! Loke mi ta bisando bo ta loke mi ta sinti ta e puro berdad.
- Bo ta tur bruha.
- Esei bo ta kere.
- Carmen awo bo parce hende cu no sa loke e ta haci. Ta ki a pasa bo?

Carmen no a lague sigui y a bis'e:

- Ami ta tur normal cu por ta, ma abo?
- Ami kico?
- Abo ta un sinberguensa gañado. Ora Juan a tende esaki el a spanta. E no a spera un reaccion asina fuerte.
- Esei bo tabata kier, ma ami lo no tuma aden.
- Carmen, por favor keda keto.
- Bo no kier tende e berdad?
- Esei no. Ami no ta tuma e palabranan ei for di ningun hende.
- Anto nos ta perdiendo nos tempo. Anto caba e combersacion aki. Esaki lo evita causa dolornan hundo.
- Bo no kier tende e berdad, esei ta tur cos.
- Ta ki mi por a haci bo pa bo ta yama mi asina?
- Ainda bo no sa? O bo no kier sa?
- Ami no a haci bo nada cu mi sa.
- No bo ta un santo. Berdad cu bo no a haci nada, ma bo kier a haci hopi cos si.
- Carmen a contest'e.
- Kico asina?
- Bo tabata busca manera pa mi cai den bo trampanan. Ma no Juan mi tin bo dor caba. Realisando ken bo ta mi ta sinti hopi dolo. Un desilusion grandi a podera di mi. Por fin mi a bin compronde cu bo no tabatin bon intencion. Bo meta tabata otro. Awo mi sa cu tur bo intencionnan ta pa mi duna bo mi curpa, como un cualkiera.
- Como un cualkiera no. Juan a contest'e mesora.
- Como kico anto si bo ta un homber casa?

Juan no tabata sa ki e tabata tende. Tabata manera un strena a cai riba dje.

- Con por tabata posibel cu ya Carmen tabata sa cu e tabata un homber casa. Y kisas ki mas e no tabata sa di dje.

Na e momentonan aki Juan a mira su dilanti cosnan cu nunca e por a imagina. Su plannan tabata cayendo na awa. Loke e no a spera. E cu tabata asina sigur di su mes.

- Ken a manda mi, el a pensa.

Y cu un stem cu e no tabata reconoce como di dje el a puntr'e:

- Ken a bisa bo?
- Esei no tin importancia. Carmen a contest'e. of si?
- Laga mi bisa bo bon cla; maske kisas bo no ta kere mi. Mi a cuminsa stima bo. Mi ta capas di haci tur sorto di locura pa mi gana bo. No ta por nada mi ta insistiendo pa topa cu bo. No pa mi bai tra'i bo curpa, ma pa nos por ta felis cu otro. Anto abo ta reacciona asina agresivo, asina sin sentido.